

四庫全書

集部

欽定四庫全書

弇州四部稿卷八

明 王世貞 撰

詩部

三言古三首

秋日于鱗邢州郡齋分韻賦十二體

白日來淒以陰
柅余車將余衾
覲傾國申同心
目流曠意蕩淫
釀高霞弋遙岑
鱗滄海脯窮林
饗者何字蘭金

削崢嶸緩蕭森觴前躍無停斟萬木飛變徵音洪濤走
北陸沈衷惛結竟沾襟

卮語

貴為掾三語薦貧為客萬言策飽欲死長三尺饑欲死
東方朔廁中鼠空倉雀卵有毛馬生角巧抱甕愚炙轂
真漸離假孫叔葉公龍淳于鵠矢欲直鉤欲曲歸去來
卧空谷

又

世間事那有此齊國王卒餓死沛亭長作天子歲百戰
垂千祀并六合傳二世廁中人斷君頭堂下客代君侯
魏冉走剛成入白起逝安平出呂易嬴政僂韋歇在楚
亦如之臣相君竊其母君僂臣弑其父人既工天亦巧
嗒何為日膠擾

四言古十八首

黃河之詩

壬子南使至徐邳間事

黃河南奔疾風北來兩重莫下激而為災萬籟喧呼三
維震顛鷁首戒南風斯忌而亦言戒北河其厲而悠悠
我心曷既濟之誰云利涉不復改轍誰云走峻不復理
楫川平為陸陸滙作澤芄芃禾黍登之場圃下有守人
匿而左顧彼實自衛曷不疑我雖有季昆遠不相援雖
有讐敵難思共存仰天長歌涕泗洑瀾

西山詩

戊申冬以秩祀行作

朝上西山艱哉巖峯溪谷多風倏暘而陰眇眇中霄惜
慄緣音十步五步不能見人牛馬却走熊羆號吟僕夫
告痛口舌屈噤修途無端北陸遵沈道有鼯鼠結穴何
深忽而過我杳不可尋茕茕好鳥栖栖中林我獨何為
偃僂不禁皇命秩祀俾孔之欽肅肅卿相咫尺爾臨我
躬不遑簡書是忱念思惛結眄此高岑

其二

皇命卿士爾往祗謁夙戒卒事畢禮以發仰盼河漢如

近寢闕斂其狂飈縱以明月綿綿連山與月見沒我我
隧途松栢鬱杌茫茫平原積氣如渤嶢嶢水巖忽起飄
鶻耳聽騷屑足躡恍忽豈不迢返憫此馭卒

戒詩

行逢宋人狂且見妍雖有夷施為誰朱顏南山之霧可
以隱斑埋照韜光其樂閑閑浮雲自逝大化長還畏壘
祀我賢人之間

其二

黃帝肅駕南游具茨襄城之野七聖皆迷慰賢亡途道
逢小兒一語瞭徹拜稱天師豈必大隗治其庶而足已
不遜他人之資

自責詩

赫赫始興紹晉維庸爰啟家族于江之東圭組蟬媽鬱
為大宗改社改邑我祀無窮

其二

諤諤司諫為帝喉舌棠彼晉陵菟裘于越乃啟聞孫乃

脂官轍惟良吳會以卜堂稅

其三

世益其滋畀我皇祖厥秩伊何貳卿司馬愷悌君子民
之父母姻族閭里是粥是乳

其四

通發厥祥嚴君奮揚繡紱皇皇被漢及江如冬之日如
秋之霜作屏王畿以承寵光

其五

唯余小子甫離於蒙鳴鹿陪京班鵷上官曾是袞裳而
薦雕蟲驛驛秋官方迓聿從

其六

嚴君曰咨母女作教母曠女守母好是導母恣狎侮以
貽余誚人亦有言匪疾則藥

其七

嗟予小子胡言弗受般淫於詠沈湎於酒惟我狂簡一
二朋友亦既肆口亦既濡首

其八

小道可觀致遠則非從吏如流狂張若馳薛彼喬山蹇
擬陟之爚彼烈炎徒思炙之

其九

高冠切雲長裾被趾聯臂蹋足遨於都市玄白惟心雌
黃在齒曲突將炎燕雀恬止

其十

天鵬閔凶突如來如獫狁孔蕃元戎用驅王錫未終誰

將竹書藪雉翩翩鳳雛於置

其十一

嗟嗟小子越隔千里冠裳其燬手足其胝號旻莫應呼
霜莫起人而得死何所無死

其十二

嗟嗟小子飲息覆盆白日未昭疇為啟昏宇宙雖廣胡
顏自存咎覺實招已矣何言

愍生篇

上坐莫喧下坐一言今者食薺馬知我酸南山有栢朝
牂暮斤北山有檉生而叅天何以彈烏請用隨侯何以
攻草請用吳鉤案鵠從禽命豹逐鼠謂汝不捷卒當僂
汝迷陽升堂國香道傍土杯在玷玉卮汲漿嫖母挾瑟
夷施幽閉師涓教射夔習擊技磁石引金阿錫禦冰揚
舩太行騁駿洞庭寄愁九天渺曠無梯埋憂九淵沈深
無蹊千日之外中山曷力百歲而往司命奚德金丹在
口噤不能餐豈無永生逝者實歎

五言古六十二首

寓懷

大禹迷終北黃帝游華胥化城高天表古莽西南隅陰
陽亡交氣民人恒晏愉乃知八極外至樂故有餘
淦戾墮中央今我不可居陰謀相攬捫肉攫自紛拏冥心超
形外冀得恣所如

其二

矯氏脈季梁任治為衆醫泣者既不肖歌者亦焉知王

孫戒裸葬其友遂因之莊氏等彭殤達人守其規求化焉能化齊物故不齊萬類日糝紛忘言將庶幾

其三

甲兵被天來朝野無偃居思欲從園綺築坏商山廬優游終餘日俯仰多所愉恒恐坤維折陵谷蕩為墟展轉不克謀愴然悟微軀吾聞至人造水火置若無濁酒且自澆塊然還太初

其四

成季推卻穀禮樂貴戎機范宣讓伯游汰者亦不違端
揖堂皇上彊楚輯衡睢六氏為三家蠶食公室卑豈惟
慚先節晉德日言哀

其五

神龍含夜光千祀自無饑即且甘其帶栩栩來見嗤劉
累氣塊結上訴咸巫師大化偶萬形此妍彼寧媼兩好
各自固焉在相是非

其六

驪姬適晉侯戎車啼粧濕入宮與君歡匡牀愧其泣才
人邯鄲豔自誇傾城國朝陪君王薦夕作廝養匹履榮
仍譏賤在約方念適焉知非夢幻役役勞真則

其七

左氏飾繁辭乃在喪其明子長下蠶室述史擬麟經毋
論委質虧所愛千秋名夸詡尺寸長冀與大化爭無趾
笑仲尼桎梏被天刑何況於二生沒齒徒營營

其八

孔德豈不弘
匡人恨陽虎
參孝亦以孚
曾母為投杼
平原虛掩涕
毛生非溺者
古有兩秋胡
空驚茂陵女
似是誠有端
偶來故無主
君子修冥冥
毀譽安足數

其九

琬王蔑周武
中興振宣謨
殷憂歌雲漢
雖早不告逋
山甫實明哲
方召有良謬
徐夷既寧只
獬豸亦奔徂
人情戒其恒
勤思內自渝
祈父怨爪牙
杜伯蹈淫誅
遂令輪臺詔
千古惜終初

其十

秋風殺萬物春氣滋羣苗何如謝寒暑不榮亦不凋
老氏薄聖人賞罰日曉曉天地為之端生人安不澆
寄情太始外恬穆日逍遙

其十一

大禹甘旨酒愀然若有懲萬機日全至焉能事尊嬰
陶公但湛飲千載自休名貧賤足肆志富貴長營營
黼衮與布衣交伸不可爭

其十二

昔有無支祈能負百夫力終古腥淮流金鑠時掣搦貳
負殺竄竄帝討羈石室梏拳錮其形千載鬱如腊中祀
無百年滔滔惡焉極宣淫蕩天紀一死事以息悵然念
休代奸人易為賊

其十三

皇王憲天則廣覆物不遺四門列九服大開明堂基羸
帝吞六雄揚兵震四垂炎武因遺跡滇嶺悉來歸魑結

襲冠簪弁服改裳衣西琛並南賁王會無後期善哉太
史公謂得聖人威豎儒守一經安能知是非

其十四

渥丹未離色返服豈不早念此有盡年徇彼無窮道角
犢挂遺編春原日游好紫雲西北來慨然商山皓為人
作羽翼短髮何皤皤赤松罵留侯奇汙諸老處則為
遠志出則為小草

其十五

文景體恭儉陳粟俯丘山易世因其資氣欲蓋九紘栢
梁既以灾建章遂造天蜀漢窮材木少府罄金錢原麓
既如髡閭井寧不然感此池上翁精靈泣帝前天心雖
仁愛母乃滋倒懸

其十六

蜀有嚴夫子淵博世無儔九州歷其八意者辭帝州五
經亦以四將無廢春秋春秋不忍讀帝州不可游伐國
且問諛君子非所酬是以終巖穴冥心蹈清幽

其十七

四大偶然合六塵遂緣生幻心從茲起空華竟何形執
幻既為幻離幻亦無成積漸由奢靡既得不可名萬動
順其軌杳然空中澄定靜與寂感吾聞之孔經

其十八

衛人迎婦人上車戒笞馬至門教送母滅竈將失火入
室見白曰徙牖妨來者此豈非所言於時未為可荆棘
橫周道雷霆紛來下礮礮小人哉君子言不果

其十九

嚴仲怨韓相避之軹深里顧盼屠酤間聶生為知己百
金何當道片言殺心起老母既以歸為君報睚眦闌入
白刃林瞥然刺俠累皮面不可跡欲以存其姊人間捐
生士殉名安足齒

其二十

狸力見距山渾夕出肥遺幹幹娛空桑鹿臺嘯鳬溪念
欲耕沃沮妖氛纏四維回首盼天閭沈深叩無期相柳

食九州膏血瀾川坻巫咸不能招倭倭馬所歸

其二十一

步出城西門跼蹐中不夷道逢一僊長自稱廣成師授
我一丸藥令我杜德機攬鏡朱顏凋隕然廢威儀禽游
無驚翼獸逐鮮辟蹄良玉豈不珍在璞全光輝惜哉和
氏子三則乃其宜

其二十二

西方有聖人自然坐蓮花跼蹐黃金相下照千恒沙莊

嚴先帝釋紛詭諸羅義種種明心地安在鬪毗夸奈何
浮屠教土木被諸華求因還生障積幻遂成魔智士達
其根愚者將奈何

其二十三

楊朱嗟旅人二婦不相當美好由心造貴賤亦何常屈
平避上官楚材湛沅湘李牧中郭開趙氏血縱橫俯念
千秋感疇能竟其方揖猶登蘭席雖尊故不芳投壁隕
礎階雖碎不移光

其二十四

哀周渝王紀戰伐浩相尋
兵戈無寧緒詩書故不任
賈豎亦釣奇王孫折豪心
片言雙白璧一字千黃金
雖非吐哺節收名良已深
挾瑟華陽宮朱門日沈沈
所以蓬蒿士寧為抱膝吟

其二十五

春秋寧無戰國辭良已修
獲主稱下臣伏劍不相尤
雖靡廩歌代優然見文柔
馮軾觀士戲無禮為君羞
況乃

杯酒間語笑皆戈矛

其二十六

老父哀龔生天年胡輕擲孫登諂中散不能含龍德被
裹捨遺金惡在留其跡生名為殺身君平悟真易二士
豈不顯四賢貽余則知白而守黑乃為天下式

其二十七

越石豪貴姿賈氏為密親苟無晉陽操若濡意何伸深
源蒼生望何如渭川濱高卧不克全北伐喪其真慎始

固所貴薄終不足陳狐兔當衢躍豺虎爭囓人七尺猶未掩是非遽難論

其二十八

赤水三珠樹橫條貫中天金氣何陸離竊窺太乙躔執法不能糾紫微竟何言下土蟣虱臣中夜心茫然豈無彎弓志腕弱意何宣矯首太陽升胡為向虞淵

其二十九

在天惡疾風飄颻無定期一決土囊口迭宕不支持強

排浮雲出又復拘閹之吹沙蕩青冥日月改光輝波濤
甘湛溺借汝發其私此物何足論但恐傷天威

其三十

吾聞共工氏力欲吞九州餘憤竟何伸舉首觸不周天
為西北摧地為東南浮萬姓棄羸秦項籍首相讐白骨
填函谷灘水血不流雖無君人業千載起雄謀戰伐浩
無終吾生已焉休

雜詩九首

季夏薄火旻出游汗徒御浮雲迴生慘凜然被霜露戈
甲滿道周行留泣相顧匈奴為我讐安能罷遣戍往甘
三時逸令征匪秋莫死地身獨任焉用親與故壯恐當
軍鋒弱恐棄中路西隣賈人子一充嫖姚部黃金橐駝
裝貲封及千戶瀚海天如赭彼人曾何覩

其二

日子追禍邁往者祆氛逼時平無二人難起有羣策英
英趙司成抗節礪金石庭陞秋風生颯然萬象辟徐卿

探亂源揚子杜機逆將相伊呂儔
皇仁示微責大澤喪明珠茫茫不可得
斯物返其真吾徒斗間色

其三

甲兵舉世隘貧賤百年輕擾擾時人意
焉知肝膽誠吾貴中心悅何用等浮名
澤雲固易變溟渤亦可耕道苟後三光
豈在凋其形

其四

客從東方來車馬何偪側昔者魏其里
今趨武安宅武

安高樓臺皇皇徑百尺歡宴迷莫旦黃金為上客魏其
里中人相與歌惻惻以此去時路等彼來時跡

其五

盈盈青閨女皎皎明珠顏迴步惜流影履綦戒前軒自
愛鸞鳳音不聞中堂言君王下長秋掖廷或見填既憂
入宮妬復愧黃金妍生業本田桑昏旦勞所安毀豔以
自秘羞同狹邪傳

其六

沒人游大壑出入蛟鱷間手持珊瑚樹口噤不能言務
光豈有希亦自湛於淵各顧徇所好馬能兩攀援道逢
衣冠客轂擊馬不旋與子行苦殊何用見疑患

其七

公子敬好客高義薄秋旻前堂羅鐘鼓後厨擊肥新千
金一言壽瑣瑣何足云中夜殺聲起鳥獸東西奔四顧
皆荆棘安見堂中賓竭力前衛營乃是纍下人公子追
自咎氣結不能陳恩施豈不廣各自顧其身平生國士

言是非難等倫

其八

步出城西門雕甍橫周絡叢篁上迫天菱藕彌陂澤問
是誰家墅居人答相錯春卉依都尉秋條屬金吾問姓
良欲陳後主恐復殊所遇多故物百歲人馬俱貧富生
醜好來往為親疎茫茫任宇宙何用竟其初

其九

如姬奉王寢公子得兵符君恩豈不深各報徇所圖秦

王幸趙倡子政乃托軀謂為嬴秦祀千載永歡娛子政
自有父趙倡自有夫將心向他人垂死心未孤冥冥移
社稷讐敵安得如微衷亮何叩惻愴以長吁

偶成

白日未易歸悄步庭中間蟬鳴高樹枝鳴聲一何閒何
知金颶襲微質坐來捐世末竟難期焉在誇少年亮無
根株固誤使百憂煎

秋日感懷

孟秋辭殘暑稍稍澄露晞飛沙來填穴玄鳥逝安歸行
人籌往路還理篋中衣夜永尚易晨白日漸如馳不惜
流光逝所惜來者非玄蟬雖微響哀思竟陳誰失志在
饑寒飽暖不可揮

雜詩

為諸生時作

東家有美人日日理紅顏春風愛如花玉立當門前西
家有美人曲跼不成鬢猶衣蔽韶質深閨閑茂年蕩子
樂行游共誇東家妍願君棄所知願君重所捐

其二

庭前有丹桂西風吹落花貴者集裊幕賤者泥與沙泥
沙安足悲裊幕安可誇既離本枝固焉能念芬華毋為
計榮辱惻惻長自嗟

其三

吾聞上古世純默澹玄始太和漸以散皇綱蕩無紀皜
皜白日內昏風忽然起生人無常邁致福豈在已馬以
一鳴斥鳧以不鳴死生者豈必鳴鳴者豈不生所以賢

達人順時復安貞嗟彼儵與忽無乃營神形

雜詩六首 歸後有感而作

開卷意不憚躑步臨清池好風從東來披拂中所宜羣
植欣向榮誰能安後時踟躕將西暝稍稍見清輝明月
雖投懷不鑒中所悲非因一尊酒疇為蔽余思

其二

萋萋谷中蘭素質何歲蕤仰不覩天日敢望雨露滋雖
或微芬發寂寞聊自知蕭艾升君堂左右爭光輝與子

固殊途安用迫相疑

其三

謾謾庭際松一生恒孤植幸以斤斧餘風霜時摧擊亮
無棟梁具又乏桃李色安能媚春陽為人事雕飾去去
勿復言斂分終山澤

其四

班姬奉增成銜理甘曲跼寧知迫歲晏商飈栗寒玉李
平一侍兒咳唾黃金屋朝矜賜膏沐夕矜薦絲竹勿讒

紈扇歌此歌本當哭

其五

山雞具五色毛尾長離徙顧影殊沾沾鳳皇當如斯不
獨時世人婁朱亦見欺栖栖簷際鳬頸秃爪距卑稻粱
不時沾鼎俎偶見遺寄聲於鳳皇何忍亦何疑

其六

采薇吳山阿行行日將夕道逢羽衣子授我藥五色謂
我當服之與天無終極生趣久已淪安能淹茲域飾巾

以待歸留者翻為客顧歎此寸心千載誰當白

讀史有感十二首

漢武筮八荒中原亦云蒿神蛟甘鼎腥天馬以遊遨歸
來大受計栢梁造天高赫哉輪臺言黔首息謳謠肝腑
授親臣八柄唯所操鈎戟化為耜大農自稱饒薄海頌
明哲寧知賢者勞

其二

子長負奇氣少多賢豪游墮身蠶室間戢影旃孟儔推

穀豈不廩懼為君子羞彊戚蠱東都惟憺運奇猷金章
耀左貂濟濟十九侯黃屋日以卑炎燼擲洪流惜哉履
霜歎千載有遺憂

其三

秦王晚資陽怒若彪虎哮尸者二十七末乃卿茅焦礪
齒肉六雄分甘先尉繚如何雲陽獄王孫中鬱陶千古
感說難逆鱗不可調所以商山客儵焉托漁樵

其四

長卿賦上林將以明得意及乎諫獵書凜然垂堂示馳
騁私所便能無忽神器衆知乘船危汙輪諍何厲為謝
張大夫曉人當如是

其五

白髮四老人漢皇不能致羽翼功既成飄然歸地肺留
侯雖強食未聞更延世蕭傅辭舊恩悵然仇廷尉矯首
前二疏冥冥在天裔寄言風雲者倘來安足恃

其六

文帝繇代來王臣盡朱邸不聞昌武輩遂與絳灌齒推
朴據細旃節膏貽來軌洛陽一少年志欲揚漢美毋使
元氣漓長者意乃爾

其七

不韋泣酖杯業為釣竒誤橐中千黃金易君十萬戶李
斯泣五刑實以倉鼠故不見三川守車馬輝衢路巧盡
拙自來利往名獨汙所以西山客居然一環堵

其八

昨者飲魏其今來客田蚡朝事衛長平夕從霍冠軍矯
矯任與灌用志乃不分何如一歲星落金馬門醉來
據地歌去就兩無聞

其九

漢魏世云季王網日下撓入則領尚書出則揆百寮陰
晴薄太陽暄霽為不消喜怒變斯須威福惟所操魑魅
竊天權雷霆廢其曹大易戒履霜為漸非一朝

其十


武帝陪陰山失得與之均二李竟不歸漢骨委邊塵及
乎元成世呼韓乃來賓舍館葡萄宮奉表稱外臣彼運
偶成哀上策豈必臻所以外寧懼覲焉思聖人

其十一

平陵朱阿游請劍誅佞臣天怒再為折殿檻不復新優
游平津邸笑謂薛韞君小生欲相吏而我豈其所効
苟不讐遂擲國士身是以達節者千秋恒自伸

其十二

淳于挾帝私公卿富交游婉嬖誰最親丞相高陵侯一
旦淳于敗丞相荷帝留白簡二十人往往中所讐泊乎
應大災君寵外虛優累累北却上恩怨同一丘千載讀
其書令人慕巢由



弇州四部稿卷八

欽定四庫全書

集部

弇州四部稿卷十九

詳校官侍讀學士_臣陸佃

中書_臣劉源溥覆勘

總校官原任中允_臣王燕緒

校對官檢討_臣盧應

謄錄監生_臣許溶

欽定四庫全書

弇州四部稿卷九

明 王世貞 撰

詩部

五言古體七十首

擬古有序

梁江淹擬古離別至休上人凡三十首明亳州
薛蕙亦嗣響焉雖於漢氏未純亦彬彬乎優孟

抵掌矣夫物貴締始則因述似易人具體裁則
無功殆難難矣然文通頗勝於自運易矣然靈
運微短於鄴中詩云唯其有之是以似之甚哉
似之於有也不佞既以罷官陸還挾策僅文通
一編忽忽無博奕之歡紬繹窮愁竊倣厥體自
李都尉而下至休上人凡二十九廣自蘇屬國
至韋左司凡四十一時代既殊規格從變雖未
足鼓吹諸氏庶幾驅馳江薛云爾其古離別一

章請俟異日為後十九首故不更擬

李都尉陵從軍

黃雲被原野
策馬欲何之
鞀鼓勁前林
招搖動旌旗
涕淚結為冰
嬋媛將告誰
長當生死訣
盡我酒一卮
白露尚為霜
安能鬢不移
惟有金與石
庶以表心期

蘇屬國武別友

驅車出郭門
北風何慘悽
良朋相追餞
行李且光輝
浮雲為我停
晨風為我啼
四牡既騤騤
御者安肯遲
彈琴

寫情素柱促令絃移泠泠流泉水助我絃聲悲何以將
遠別楊柳吐青枝行人插枝去往往自成圍少壯若流
颺逝者不復歸常聞忠與信蠻貊可由之及時各努力
王路正清夷

班婕妤詠扇

妾有冰紈扇云是齊宮作得尚君王手揚颺芙蓉閣秋
氣忽見憎冰簟同零落卷舒夙所易銜分棲中箔物候
代相遷君恩終不薄敢以南薰至逆笑狐與貉

孔北海融述志

栖栖岐山穴避狄如走兔擾擾厯下田鹿豕朝與暮時
至偶有為人功竟焉數虞帝小鰥夫虛名攘唐祚西伯
老禿翁脫身美人賂百獸豈自來鳳皇人誰覩垂死竄
蒼梧薦禹如有負戎馬踐幽王實以妖女故大運等循
環智巧安能度十讀九廢書千秋榮朝露寄聲謝時達
毋為聖賢誤

酈徵士炎見志

勢屈難見功時危易為跡大海無圍鱗高風有矯翼斯
此萬里搏聊余一偃息清時竒邁隱材士多失職小者
州邑掾大則公府辟卑顏竊升斗攬袂承書檄寥矣帝
者居永絕渭川跡吹簫夕拜相屠狗朝開國顧謂賈少
年興文何太迫詩書一長物禮樂終奚益聖主正當陽
羣工但脇息富貴垂昌裔名聲施無極

魏太子丕公讌

置酒臨西園澄夜佐微涼華蓋飄圓月列宿散陂塘景

風媚芙渠冉冉布奇芳清吹相間發驚鳥顧我翔急節
促飛觴為樂浩無方俄俄衆賓舉相與歌太康芙渠自
有芬君子自有心良辰不重得命爵莫沉吟

陳思王植贈友

成周宏昌業多士乃日新遠者由耕釣邇則介弟親赫
赫我皇魏九有悉來賓庸蜀為逋藪江介有逆鱗聖心
輸納隍黃鉞下秋旻樓船彌東渚劍客出西秦天網布
中逵所希在鳳麟疇為百金士吾友氣如雲太阿拂朝

霜繁弱抱宵輪揮昨無前敵抗志在必臻伊余忝藩翰
夙昔備宗臣同歡岐憂戚厚祿養其身孤白足禦寒片
腋非所珍鉛刀望一割微穎不見伸勇士思喪元舍生
乃成仁懷君篤明義聊以示殷勤

劉文學楨陪讌

公子富令德窮樂在清時卜晝啟初筵丙夜猶未疲叢
篁夾文館碧萼綴丹梯潛月青林端萬穎射金池澄露
滴華桐薰風穆然吹炮炙參差進觴醴縱橫飛伎士慕

新端肉奮絲竹馳淵鱗中踴躍宿鳥無寧枝冉冉東方
曙謹唱掩鳴雞冠蓋散交衢粉澤有餘施畸客誇殊遇
歎息不可追

應文學場侍集

烏鵲東北來尾禿毛不全得與鳳皇游珍禽日周還今
夕何良夕公子開妙筵請寬童殺罰聽我醉後言少小
事任俠結束過邯鄲邯鄲有奇女美盼輔朱顏一彈離
鷺調再彈別鶴絃感君纏綿意千金坐來捐盟用南山

石好用蕙與蘭蘭芳有時歇南山幸勿刊

王侍中梁懷德

炎德中崩潰妖師亂天綱蠻荆非吾土竄身不及詳
日月東西匿雨雪正雱雱歎念周京咨涕洟縱橫桓桓
今上宰膺懲震八荒解我南冠紕寘我侍從行譬彼冀
上英洗濯薦華堂公子推明愛歡燕結不忘白雲流尊
解緡纚應朝陽萬舞煜中庭蛾眉吹素商常聞既醉詩
飲德厭膏粱摩頂皆君賜何以報恩光竊希吉甫頌清

風播無疆

阮步兵籍詠懷

昔我游蓬池上有古時臺長嘯入青冥萬籟參差回返
顧大梁城櫺扉相對開馬頭旦駭駭日莫爭飛埃漢屍
既雍雎項血復殷垓天地無精色日月久徘徊唉汝二
豎子何如酒一杯

嵇中散康言志

擾擾兩象間生人各自為余本田野夫少小無遠志珪

組豈不華好者方為貴習性偶成懶教乃非余意竊窺
莊氏言頗懷養生計忤外非有干撓心乃足累結茆流
水曲綠槐信所植治鍛清陰下彈琴衡門內仰見孤飛
鴻寥唳出天裔阮公青雲度濁酒幸與契山生何為者
勗我殊不寘蝸廬欲枯壁蠻觸爭何地儵然龍門色頓
忘寰中事

應侍中璩百一

羲魄尚高蒼天命未我離云何紉袴子往往意為師阿

閣連曲房沈深不可窺齊醴腐其腸伐性有蛾眉姬姜
奏新聲歡多樂不支藥石為仇讐美疢日以滋東岱添
新籍鬼伯來見追仰與高堂別俯與親愛辭宗祀日蕭
條涕淚如綆縻人生非金石快意多伏悲

繁主簿欽詠蕙

娟娟孤生蕙托根湘山厓上壓千仞峰下臨萬仞谿微
質殊衆卉謂為造化私風霜相凌迫雨露不見滋朔氣
旦夕深清芬坐來移幸登君子堂不足配芳徽仰慚檜

與栢青青長不衰俯愧東原草猶得奉春時

張司空華離情

飄風吹枯樹皎月鑒空墀曾是風不留娟娟佇遐思飄
若蕩子心皎如靜女儀鳴琴中成瑟哀絃來間之蝸蟬
乘秋沸熠燿與暑辭苔蘚歷冬春悠然驕履綦攢念乃
攻中徵瘁在蛾眉青陽何方至桃李嫁路岐寄聲松與
栢斂分守山崖

何司空劬贈貽

宛洛何洋洋經始先人廬崇巘夾脩篁清波出文魚棲
遁焉足陳仁里私有餘張侯負淵博秉志乃冲虛出則
寄干城入則宏廟謨決勝開冀封脩然良若無多懼昔
忝均耦耕亦今愉侯其謝鞅掌就我暫為娛命爵復彈
琴徜徉非一途况有春陽色藹藹在桑榆

張黃門協苦雨

昏月初離畢丹霞復榮朝女風扶輪轂雌霓振旌旂杳
杳七曜潛沈沈二儀交穴螳登崑垓水鶴徙故巢土社

歸狼籍木偶竟飄飄立壁俱就頽曲突黔以消密液肆
沾飛餘菑及蟪蛄九徙不足歎百念徒爾劬念彼耦耕
士棲畝敗禾苗念彼行旅夫然桂中夕勞東征缺斧斨
北禦解筋膠眇矣發棠歎彌哉塞瓠謠厭見沈蛙竈妻
子吐長嘲

左記室思詠史

堯舜相為貴不能屈巢由挂瓢箕山樹洗耳渭水流四
岳等朝榮二女亦蜉蝣黃綺卧商岩目若無羸劉瞋瞋

五色芝可以飽千秋如何崦嵫路俛首建成侯神龍雖
自尊饑則鰕鱖流寒蟬雖自眇恥與鳥雀謀

潘黃門岳述哀

忽忽寒將徂冉冉春欲至寒徂復留戀春至胡濡滯庭
除無雙跡帷枕有孤涕猶殘流黃機上繡鴛鳥翅微音
長辭聽手澤時流視行雲仍恍忽明月但髣髴恨彼伺
晨鳥精爽驚夢寐白日闕冥車子來既不易黃泉稀生
軌予往將安至躑躅墟墓間縱橫竄狐魅宰木漸以拱

朽骨焉所恃余髮既種種時來能無會

陸平原機羈宦

屯時播明社厄邁點華宗逝以丘園賁豫此拙薄悵陽
春冠天來松菌遂不終弓旌荷崇招朱紱被微躬擊楫
指洪河回首盼大江銜恩輕密戚改誼訣故邦繆通承
華籍得托黃綺踪月請雖云薄優游侍青宮獻納百未
酬敢希疏傳風衡門依清苑日夕見嵩卽數往今誠乖
撫物已未工徵歌時自寫慨焉眷飛鴻

曹司馬攄感舊

客與榮貴去身將賤辱存昨日翟公羅今張寶侯門中
厨出旨酒不足奉壘尊酒味非中薄人情自寒溫女蘿
與松柏本自非一根松柏雖枯死女蘿尚攀援行人為
代恨不與盤石婚大火發昆岡炎炎竟何論

傅司隸咸雜感

紅女戀一機丈夫慕九州拂袖出門去妻子不足留二
室造帝基黃河噴天流一覽意無餘西入咸陽游咸陽

帝子里車馬若雲浮炊金復饌玉趙瑟間齊謳東家霍
司馬西邸平津侯南隣外人館北戶文成樓雞鳴先朝
日起者何所求試言平生業十舉九不酬北風旦夕吹
敝我黑貂裘低回返鄉井耕釣亦悠悠

陸司馬雲贈婦

春卉畏秋序冬秀虞炎德亭亭南山栢上敷芙蓉的凌
風表貞操承陽饒豔色眷懷結禱始言在三星夕燕婉
吐芳脣綢繆展清臆靡靡輔屬體熒熒光汎席弧矢為

我讐車輪倘相迫明誓雖在今合并非夙昔矯若分飛
鳥乖離恨羽翼何以示遙悰托此花與栢

劉司空琨傷亂

雖云大厦顛一木不能當在昔有靡氏孤旅興少康避
狄奔岐下周鼎日隆昌桓桓仲山甫車攻佐宣王巨君
挾狙詐炎漢鬱銷亡九有盡為新片燼起崑岡興廢固
無端賢者自有常天柱中崩絕妖牝操皇綱魯衛相魚
肉聰勃噬邊疆自余與祖生束髮共徊翔慷慨動鳴雞

寒霜溢干將天意與我違邊塵飛晉陽干戈迫跼武穹
廬被川梁儼若籠中翼欲飛觸四旁豈不念昔賢何以
趾遺芳大海呷鯨波一葦思自航悴栢東顛崖陵苔摧
素商存為七尺辱沒為千載傷

盧郎中諶感交

杭稻吐孤穎狐貉獻微腋豈不念饑寒焉足充衣食顧
此下中士得陪虛左席投漆不違膠援蘿長附栢邊塵
冠天來幽晉紛蕩圻慚非千金璞謬以連城易揆負故

主恩聊探昔賢跡程嬰挾秘笈趙宗復血食豫讓秉貞
信辱身三不恤倉卒脫秦關實繇鳴雞力從容復齊相
乃是求魚客銜報誠疚心逢邁方顯跡山川回東首芊
眠白雲隔三復繞指言憂來填胸臆

郭弘農璞游僊

東海馬可耕衡廬不足家常聞金天女漱液若木華高
掌鬱千尋上有青蓮花拍手呼鸞鴻竦身凌紫霞子晉
相紹介洪崖御我車朱脣粲貝齒永願托姻婭碧藕吐

瑤絲火棗紛如爪
玉盞澄天酒
龍虎衛靈砂
歡樂光景
駛千歲未為遐

孫廷評楚雜述

北風無停吹
玄髮日夜素
命駕遵虞淵
將適萬里路
親朋來張祖
妻子挽悲慕
大造本無知
安能隨物鑄
精氣偶然合
妄形為吾錮
善惡既強名
禍福亦虛度
東鄰治彭老
服煉金石固
西鄰師蒙莊
謂等陵茗露
達者竟何言
冥心黜兩慕
時至亦不辭
未來無煩慮
寄謝醢雞子

區區甕中度

許徵君詢自叙

方朔明大隱君平探幽蹈去矣無足差吾將從所好春
理霽上耕秋歸剡中釣在物多饒境選隙時一造丹霞
挾回漿白雲裝行屨奔險吐葱結半眠含呌窹何以明
有獲听然動微笑徇物非余術資身良已要豈不愛微
名空谷將誰耀

謝僕射混游覽

顧此有盡日慨焉生游思訊謀紛委馳解者應自寄清
池屈叢薄沿洄信疲駟層觀景風返喬陵紫雲憩跳波
悅文鱗迴陽暖棲翅黃菊何荼蘼蕭條得其意時序非
良適取足竟有會寤歎言故歡幽芳徒延遲彼境如可
欣合并安所事

殷東陽仲文興矚

羣秀方謝朱忽與玄冥迫蕭條在時寓達者亦有適木
落鮮滯歡楓留蘊明色斂汎澄天根回滋收地脈遼空

吐纖翳青崖間微滴興至不盡觴毋乃佳時擲況我英
公子肅徒羅周席密坐人起端遶歡任所擇紆華起物
勝用壯緣酒德竊冀燕然勛敬為閔餘墨

謝僕射瞻秋餞

少皞承時柄赤帝握天權清商應嘉節飛眺俯中原羣
象俱投肅萬寶將告堅齊魯遙拱帶河洛自回環肥遯
感聖心豫游布長筵旌旗代林組笳簫按候宣黃菊華
行李玄酒返朱顏昌期選後夫枉士思故山巢許容為

客虞德一何玄達心愧薄劣茲尚詎能言

支道人遁讚佛

羣象倡明茂四炁適清和凌晨將投禮首宿事奢摩閃
若太陽來朗耀周九阿諸天從帝釋旌拂紛婀娜修羅
戢怨刃波旬解障魔馥郁旃檀樹彪炳珊瑚柯醍醐釀
甘露徐挾神飈過千葉青芙蓉一一凌紫波流鈴相間
發寶座鬱差我上有慈悲父金頂秀青螺端嚴八十相
妙好一何多微吐柔細音雍如鳴鳳歌惠澤徹無間哀

響徧婆婆密迹中踊躍大士亦隗俄獨解舍利子回心
乾闥婆靈花散優鉢智果結菴羅法鼓撞震方慧燈導
恒河方廣距由旬成違僅刹那冥心歸真諦毋使歎蹉
跎

陶徵君潛田居

貧來迫我耕既耕貧不離誰云非長策舍此亦奚為今
晨作勞罷曳耒歸何遲鄰父憫我勞要我過其居芋葉
薦魚鯖濁酒且盈卮慨焉思人世百勸百不辭今人不

為古古人當在茲過隙能幾何為樂當及時勞者欲有
歌我歌自吾知

宋文帝北伐

內史斥樓煩嫖姚越祁連將逞域外武寧無務德言中
土厭勝朝左衽垂百年先皇振九伐霈澤灑秦燕大業
未逮終妖氛日橫纏版宇罹蕩析黔黎困倒懸玄黃既
在篚壺漿寧不前俯瞰單于臺秋風正蕭然戎車雖閑
飭尚其賴諸賢

謝臨川靈運游山

山水慕孔樂丘園慚易賁殊恩賜初服薄游返真理改
策桐廬峰遺舫富春溪陰壑攢空翠陽崖吐清泚行巖
芳露潤餉榼流雲止叢林蔽啁晰徐風發旖旎解籜篁
鳴玉辭芭萼呈綺溜溜實乳滴活活溪源徙詫歎接來
奇邈回惜去美流光暮搖漾白石何齒齒想見羊裘客
眇言曠千紀滯迹好尤人選念良在已蟬綏信遺脫漁
釣從此始

顏特進延年侍宴

赤縣騰真氣丹觀切太微千祗肅羽衛七聖扈鸞旂神
舟二龍躍天黃八駿歸陸馳皆跡射水擊盡飲非行宮
初戾止張樂答澄輝神魚翻鏞賁靈獸舞翟翬金璫景
風觸瓊弁白雲圍趙女擊秦筑吳娃鳴越絲巧夫歌人
偶眩士吐寒曦桃榴煜崖冠苻薜燦波衣烟澄淮楚出
天濶江介微臣歡畏童殺聖洽詠鳧鷖滄溟返西注濛
汜鬱東馳天喬欣當御鱗翰驕奮飛苔萼誠微賤鼎俎

內慚疑

謝法曹惠連叙別

微寄迫如絲將適千里道
仝心憐友于言餞春原草
顧聽雙鶴鳴何以洩予抱
解纜羨歸潮回膺怨層島
遙遙西陵浦宛宛澄波流
飄飄驚風發湯湯沸陵丘
揮鋒割舲檝吹素染旌旂
旂八荒無岐色七聖迷所
由賓儔久告絕含悰將訴
誰仰希退飛鵠俯感觸藩
羝冥息臚故歡端居奏新
悲悲新纏難遣歡故杳莫
追園林饒竒趣往

往媚居人哲兄昔領袖伊予並沈淪篇裁不孤賞席至
無隻陳華月在清珪武夫映見珍予行浩未已子處將
何如青蔥東齋沼有無長新蒲紫籜解修篁文鴛弄鳴
雛從容命觴咏倘以及睽孤

謝光祿莊郊游

泳思遵江廣托矚在嚴垞百堞搖容灩千棹和鏦錚來
鴻欣知止叢菊誇後榮盍簪攢雲岫散綺宿霞汀清霜
披林覽枯卉感籟鳴宛勝時扶策沈懷聊屏觥容華非

予擅物序攪我情將治鹿門業歸耦長沮耕毋染臨淵
嘆遂為漁者矜

王徵君微養疾

秋風有奇色能使昔邪黃一葉嘔商曲羣鴻盡南翔白
雲棲空除華月湛匡牀外門羅來雀內戶按啼螳卧疴
與性會華炫非所臧精液隨年銷金石依形長湛然守
寸瑤委順無何鄉

鮑參軍照戎行

嚴烽舉中夜游騎犯秦涼天子投袂起劍履在寢皇左
鋒當魚麗右鍛按龍驤曾是東征返離離缺斧折束胸
見使者距躍諱殘傷轉戰馬支嶺蹠血甌脫塲塞馬勁
如飈橫驅不可當部曲星散盡獨身擒其王枯骨遺鳶
喙英聲貫人腸生存百年事沒者萬年芳

袁太尉淑從駕

衣冠神游肅弓劍聖情紆蒸新嘉周典祠雍陋漢圖萬
象改冬凜九有悉春敷屏翳躬先掃玄冥戒後誅金椎

隱馳道玉戚護乘輿蛟龍擾擊草麟鳳翊流蘇朝雲煜
容衛夕宿燦周廬鳴鏞震海立傳蹕應蒿呼父老望張
飲士女欣大酺人文被巖壑天藻冠京都陳詩悉二雅
稽典嗣三謨臣歡奉元首賡歌幸未孤

休上人怨別

落日多媚景楚士中不怡風吹湘山色往往盡成疑彼
美無與晤曠佇生勞思三枯岫中蕙再茁園柳萸博山
寒虬燼屈戍繡蛛絲徙倚翹芳跡沈吟黯膠頤虛有焦

桐尾黃金為誰薇

謝吏部朏省直

禁籞森木天文昌爾璇漢風色飛廉館波文屬玉觀銀
虬隱自鳴金鵠對如翫薜衣繡丹澁蝸書吐玄燦亭亭
鍾山秀果愚何歷亂務簡化日舒興言染柔翰即事台
可悅奚必休請澣敢用蓬戶觀夕從朱門旦

王著作融游邨

風鐸流清梵天花墜妙譯解脫身自餘清虛勝能擇薄

游名王邸儼如化人宅多寶城基階明璣噴沼澤蘭椿
芬自棲焚堤綠如積和薰調言鳥輕烟媚垂薜束峽饒
奇聲低春出遠色即境良非幻冥心庶已寂至哉物外
游超然忘所獲

沈僕射約餞別

九伐當熙代十乘啟元戎以我師中吉占彼後夫
齒皇仁等乾運萬寓悉帡幪揮眸無拓拔抵掌有山東盤龍
五花劒號烏七札弓蠶旗布飛宿虎落繞長虹峻函旣

平踐嶢關復斬通帳飲渴涇渭軍聲搖華嵩高筵勇
爵中垆建武宮翻嫌賜履狹不數太師功

范僕射雲貽友

蓐食向東疇薄暮始言還遙見車馬跡藹藹散平川雞
犬若有戀鳥鵲尚盤旋顧問應門錯愕相告言言有
冠蓋客眉宇何軒軒入門更左顧徬徨回就轅北風吹
馬嘶落日送旌旃沈吟思久要疇為故所歡自非徐方
牧誰能顧閭閻貴賤常人態君子自金蘭梗杞振休風

高雲薄旻天書此布區區在下亮弗援

江記室淹卧疾

寒暑更代至為我煉朱顏槐庭綠陰逝稻隴黃雲還
鳥雀思改棲雞豚亦不閒據梧辭紛尚采薪負竒艱
推遷候其所睽離思乃殷遙心先枉渚選友向江關
橘柚組哀景雲霞分故山青燈代為耦單巢竟成鰥
鰥病稀靈劑循視在刀環

梁簡文綱閨懷

歡聞子夜變妾作懊懷憇城上烏畢逋牆頭雀勞利楊
白風捲花桃生雨辭蒂引念磁石難分顏剪刀易密約
懸庚癸秘辭屬丙丁何朝更爾爾一一問卿卿

何水部遜示寮

沈寥澄丁夜黯靈流泓碧曉月媚獨征清霜凌行色稍
稍曙吐帆微微風飽席林輝驚棲亂波響跳鱗激喟然
川上逝念此山中客晨涼在衾裯晝事餘巾幘飲食不
為人游夢從所適撫已能無愧達生邁隱跡年事離余

往簡書代相迫寄聲夔龍偶終蹈巢由則

吳記室均春怨

悠悠倉庚語喚此簾櫳曙萬象欣遇新賤妾不改故買
愁榆莢錢粘恨隨楊絮草信忘憂難花疑合歡誤百種
枕上心千條夢中路眼波寫欲竭眉峰解還聚昨者王
闕書更移金河戍玄冥彼方辭青陽茲已暮但覩朱成
碧未解鬢變素對影欲有陳冥然不相顧

庾開府信校書

森蔚誇東觀淵穆表西清左史讀丘索孔公比老彭金
壺浮泥汁青藜太乙燈六緯受李氏七畧倣更生白馬
公孫辯繡虎平原名身依昭回漢職列葱離星陳矢徵
肅慎吳書問洞庭騶牙收邊籍貳負表山經窮探歲加
我執戟聽沈冥

陰常侍鏗送別

秦淮將征棹西興導返艫誰言劍合地即是袂分途比
帶將同縞擬敕詎如蒲倚醉聊慷慨臨醒復鬱紆遙帆

雨中失清尊月下孤裁書悵南雁托夢怨單鳥寶鉸銀
平脫珠韞金僕姑還期一文軌方駕騁天衢

薛內史道衡酬憶

秋風吹大荒秋月滿河梁尺書問馬走一枕徧羊腸羊
腸幾屈曲輪鞅聲相續句裏孟門青意中淇水綠綠水
如絲流青天去不收王猷興欲盡衛玠始生愁愁人自
宛宛日長歲苦短靡蕪虛早齊不睹松柏晚

楊司空素坐懷

幽居擅丘墟塊爾稱獨晤盤礴翰墨林沈冥詩書趣裒
影文晝寂飛英點林素溪藤飲猿接梁棘歸鳥輪四起
垂天雲疑亡出山路屏刺少所通非心不成故慨此穆
如侶抒言托遙慕

王參軍勅夢游

役神苦煩懣羈形困局促言攬化人祛稅駕從所欲瑤
階淨於砥寶觀紛若簇清簟展雲幄言鳥流風曲舒霞
縹流草垂露布森木中有青蓮冠脩眸炯清淑授我瓊

函字長跪不敢讀秋飈觸明璫吹我墮几褥琳琅恍猶
聽半鬱疑在矚惆悵將起端多歧浩難續

楊盈川炯游峽

蜀江自西來日夜流不息東為荆門峽崩騰鎖南國楚
師既以燔秦疆漸以畫萬古擘石青千秋吐灰黑我行
仗三老揚舲浩無極入耳寡停聲寓目鮮留色日落一
線明悄然中原碧惆悵為雲女虛無不可即

盧典籤照隣詠史

昔有嚴先生少妻仙尉兒泥塗兩魚泳風雨六龍飛黃
紙求故人白雲長見依遂令箕潁客復覩勲華姿帝腹
何便便舉足忽踐之客星歛然去帝座光芒披笑謂鄧
氏子策杖一何卑巖穴澄秋色烟霞蔚天輝怨見千秋
士寂寂西山薇

陳正字子昂感遇

園桃畏霜霰零落不自己吾聞諸古人哀榮亦常爾所
以遇春榮澹乎無可喜内外了不干熹微識其始明月

海上來中天澄如洗至寶嗟已失囂然諛殤子

沈詹事佺期訪道

玄天洩至秘大地輸真宅言訪赤城居試探黃庭策黃
庭何其妙幽闕守玄魄赤城信矣高靈仙寄神跡鸞輶
夜分至鳳管空中適眉揆芙蓉青顏欺舜華白歸霞散
衣桁流水澄巾幘泠然馭風來倏爾凌雲息勞役悲在
今夷猶歎夙昔因牽絰原網遂鍛沖霄翮愁雲幕遠近
慾火煎日夕隱隱移少年沈沈散精液敬謝廣成師為

我示天則竦轡崑崙顛揚舠弱毛澤滄桑坐經變濛汜
何虞迫火棗幸有餘乞師知不惜

宋學士之問祠海

稅駕依海壖肅祠乘嘉月朝日侵夜生春溟際天濶驚
濤吐千嶂窮島迫一髮百谷俱讓王九州悉傾穴星河
時翻動天地中出沒體薦秩禮殷裸將醪芬發歸然祝
融坐肅矣羣靈謁環珮趣飄飄靈旗去怳忽緬懷拙薄
踪承明昔三入敢問乘海桴竊希迷津筏弱水未易方

崑崙馬可越矯首貫月槎極目含珠闕倘呼龍伯人為
我灼鰐骨

崔員外顥游俠

東風五陵畔恣意少年游魯酒銀鑿落宛轡金雕鏤狂
童舞拍張妖女彈箜篌酒酣萬事出橫披宮錦裘尺八
鐵匕首能令都市愁避讐從車騎結客取涼州北斷匈
奴臂西斬月支頭論功獨第一天子賜旌旂圖貌在麒
麟英風冠九州笑謂故所知功多罪不憂當時殺人者

今日海西侯

孟襄陽浩然留客

散髮池上酌好客
偶爾會童子三四人
盤殮無兼味
巢露時自滴松風為誰至
冉冉落日盡悠然
發真醉陶公既已往
千載淪茲意

王右丞維山居

為惜輞川好
攜家事田作青山映如帶
綠樹相歷翠燕乳
林花亂蠶肥
桑陰薄微雨終南來
鯨魚藹然樂餉饁

下鵝羣東書挂牛角樵斧入澗深丁丁送餘斲歸逢耦
耕叟問我來朝約坐愛微風吹尚隱殘日脚得暇便相
過床頭有桑落

岑嘉州參塞譙

邊草五月綠秦馬三春肥鳴鞭飾珂子色奪宮羅衣朝
謁府主出夕從射獵歸珊瑚照夜筵行酒羅金緋趙女
青絲彈胡姬白玉圍酒酣燭忽滅語客任所為橫行纏
頭錦零落珍珠琲明月出東方清波溢驚旂鵝青約素

腕雙雙扶入幃北風旦暮吹黃塵俱倒飛如何咫尺地
步步春光輝為謝蓋大夫時清刁斗稀

高常侍適詠途

少小愛漁獵不解慕清朝春風蕩益諸草綠胡馬驕一
劍揮兩從隻羽貫雙鵬折節讀詩書策名列官僚雖與
貧賤辭未遠案牘勞今朝涉淇上中原莽蕭蕭天晴太
行出峽急黃河搖游鯉跳伏獺飛鳬墮鳴皋恍若舊時
游欲呼故所招奪標胡姬館走馬河陽橋丈夫自有命

時來則金貂安能對玄經終歲長寂寥

李翰林白自明

海色搖地綠崑崙插天青天地不相忌千秋弄精靈偶
然復生余搏作世人形俗眼不能識強呼為歲星昨歌
咸陽市如意擊玉甌醉罵文成侯白眼春冥冥新豐酒
初熟胡姬手如玉十千換一斗醉即壚頭宿中夜黎眉
顰銀璫響相逐上帝奏鈞天名姓登紫籙蛾眉七十二
停箏待新曲攬筆虹霞生鳴毫風雨促天姬粲瑤齒重

瞳亦回矚衣我宮錦袍葡萄發醪醑片言朝不投夕買
范生舟三神未欲返五湖且須游魚龍聽咸池遂為釣
者求愀然發長嘯千金等雲浮虞帝放丹均波應及許
由不然箕山客今作潯陽囚黃鵠脫樊籠低身瞰九州
銜珠報恩德然後訪丹丘

杜員外甫述貶

昔我遊山東高李相先後豪鷹搏青冥所擊無不取斲
句必老蒼驪珠戀吾手西入咸陽城落魄鮮所偶駝錦

青貂裘半為酒家有時來異援出三賦天子售泚筆中
書堂公卿盡回首蟣虱脫洗沐毛羽出抖擻清華文昌
步磊落國士耦欃槍亘北極熒惑趨南斗哥舒小豎子
棄我潼關守萬乘僚蒙塵羣公但奔走嗚呼上帝仁蒼
茫意愈厚馬嵬翦陰孽朔方建陽紐桓桓漢陰公玉璽
主親受制曰相國琯汝往馘羣醜戎車實閑飭驕將違
指授遂令陳濤士義血漂杵曰天威震莫測左右奪申
救甫也一小臣上書戒求舊孤忠報社稷餘分推朋友

幸免左伯誅仍寬馬遷咎優游上州佐零落一野叟雪
壓履下趾風吹衣前肘饑寒自切骨虛名在人口窮途
往念至遲暮新恩負千載與百年茫茫付杯酒

王龍標昌齡獨游

屏出乖物情薄游寓余目春風夫如何時見千里綠蠶
女猶未來桑陰正渥縵上有戴勝鳴間關奏絲竹彼奏
非有適此會如見屬因之念友生歷亂我心曲沈思入
迷徑迴策從疲足歸及午餉餘言跨返耕犢

儲叅軍光義詠耕

農事有常期侵晨向東畝豈不念筋力要為口所驅大
兒把桔槔中兒佐犂鋤小者力不任餉盭繞周涂盡室
事農耕誰還讀我書榮華誠快意憂態亦不疎團坐傾
濁醪移蔭就桑榆好雨從東來庶足代勤劬莫以蠶角
牛當他駟馬車

韋左司應物寄僧

慮澹無可屏端居生夜清秋風在長松謾謾令松鳴因

之動遙思思我方外朋趺坐深草色流塵瘞函經多露
濕空山欲往未能勝迴心入初地萬象了不應方知見
聞表悠然有合并如何怨碧雲役役傷道情

弇州四部稿卷九

欽定四庫全書

弇州四部稿卷十

明 王世貞 撰

詩部

五言古體六十七首

雜感六章

時以上章國門外感事而作也

新秋涼氣微
大火猶蒸溼
不知當庭樹
何繇中銷落
葦葦梁間壘
玄鳥翩然作
今逝如有乖
昔來如有托
人情

亦已長積哀方成薄

其二

冉冉西流日杳杳東逝川
棄女守空閨不知時變遷
膏沐一朝施含羞不自前
雖復回青盼盛年坐君捐
二八方偶進駢齒復齊顏
為媚須及早為恩須及好
再收當中熟再捐當何道

其三

赤龍困服箱足下有八埏
蒼鶻困絳鏃翮下有九天東

風吹孟諸短草何芊芊
鴛鴦飛我側狡兔出我前
燿如雲間電挽弓不及弦
勁翮應脩蹄為君蕩羣鮮
人生非遇合安能自稱賢

其四

手攜綠綺琴去上高山阿
落日四無人蕭瑟揚洪波
凝神入天倪心指遂相和
歸來奏清曲商飈絳纖羅
白雲從東來為我不忍過
奏者豈不厯聽者已隗俄
無情尚有知有知當奈何

其五

貧賤誠難處富貴寧易居疇為執兩端令我與願俱慕
藿猶未糝列鼎窮珍腴饑者靡不佳飽者不羨餘窈窕
南山雲歸乎恣所如

其六

千金買駿馬百金買轡頭百千製狐白十千珊瑚鉤相
從諸少年宛洛晝行游宛洛富名倡挾瑟進清謳但知
媚黃金馬知我為疇出當從客懽歸當從婦謀

書感

嬋娟無終極
燕趙徧蛾眉
百卉就春陽
芬豔迫叅差
嫩人臨流坐
顧影中自怡
豈以為人妍
皓齒發相譏
鹵莽乃時情
千秋長若斯

其二

白露濕螢聲
枯葉悲自和
蘭膏凍不發
三星漸沈河
里中多輕薄
昏醉相經過
兩意既非當
雖歡其奈何
亮無同衾願
閉戶斂雙蛾

雜感

朝陽發東隅羣動借其光流影忽西頽萬象亦含章誰
云涼熱變遷代固所常爾日平沙堤今來禾黍塲鳥雀
戀故枝車馬依他牆要知親者短不及疎者長邈矣任
生操咄哉魏其傷誓紉幽蘭珮雅誼疇能量

其二

髻齡操觚翰冠弱庸清朝駑駘質謝鞭策閉戶甘間寥揮
汗畏請謁四顧誰親交此時大道遶車馬爭流濤舉目

灼天華回盼生秋蒿亮匪萬年身胡忍棄塵囂呼兒理
殘編手復量濁醪得意且如此後來惟所遭

其三

為性本薄劣聊樂在詩書稍與古人近頓覺世人疎飽
飯譖高卧忽起臨前除隱隱帶西山歷歷薄吾廬百里
距非邇爽氣時吞噓出門復入門舉足愁塵污以茲欣
散秩牢落揚雄居

初入理園土

日子事鉛槧握志在皇羲泣車豈不深化理一何卑咎
繇固賢聖母乃遜后夔人情如趨濕盛時能豫哀更以
秩守寄身為獄吏師悠悠互朝暮戚戚此園狴

其二

園狴何崔嵬貫曜麗幽方當晝日返冥踰春草不芳糾
糾禦呵怒離離累訊傷下當適重泉上永隔天閭誰恣
逝矣故更悲來者長

其三

庭前有高樹好鳥相因依固以效和鳴鳴聲一何悲疑
歌復疑訴流調更流悽此鳥寧有異聽懷多是非

我有一壺酒與于鱗賦

我有一壺酒與君醉花下東風日夜至羣芳無停吐高
歌蕩浮雲白日光起舞陶然中心悅忽往在千古匪以
藉世羸他人安能取

比曹初考述職有感

歲月不我即祿食三已暮揣分冒兢惕程已慚素尸出

負友朋屬入慚父兄規殿最他所任得失中自知伊予
少淺涉夙好經生期稍見事迺謬漸習心永睽咎繇固
聖者其究亦趨時南容復白圭已甚非仲尼滔滔亘天
路戚戚將何誰

偶書

閉戶延素晷創足避華徑所惟力不任非繇意無競沈
淪既已甘芬芳亦馬盛寄責聊簿書娛懷乃篇詠策短
世何長瞿然恐難竟得酒且復斟吾當醉陶徑

遙望北邙山

遙望北邙山塚墓鬱相樛石獸蹲草間妖狐誤來求斧
斤焉施伐原窞各趨疇積泯漸成無焉能覩其由生時
藉世羸跡往神不留豈若蓬蒿士一語為千秋

省中視事有感

披案適不樂起步臨前庭顧視雲中照翳翳迫西楹過
日若傾波誰為念不停霜卉愛青陽鬢絲憂素莖刀筆
理何深能令走世名蜀客雖寂寞猶得守玄經

睨睨篇

睨睨求友也沈子築室有鳴倉庚遂以顏焉王
生過而賦之愈益盈耳矣

初景草緒寒浮陽依芳樾黃鳥何間闕言茲媚蠶月柔
絲驕未調輕簧凍難發聽曲幾其真條風吹成歇遷喬
焉所覲求友翩更切我有盈樽酒偕子候鳴節婉孌中
心契忽往在天末羽翮臨見乖覲焉增煩結

三良詩

白日歸苞櫟荒飈助游環聞道俱聲咽歎息此三賢臨
穴惴惴下彷徨顧平原奄仲即長昏鍼虎亦何怨逝者
許一身存者留一言清渭東南外誰不忿王官戎樂既
銷亡回首見雍川扣角與負薪各自愛其全惜哉百夫
特粉黛同所天

蔡文姬歸漢

漢相肇休業威攬徧九圍維昔先臣邕蒙志赴屯夷太
陽下迴光寒灰亦不遺黃金馳大鹵穹廬出蛾眉朝辭

單于庭夕宿廣川
湄眾鳥媚其巢
接翼競言歸
羈鵲將雛去
傍徨復置之
仰悼雙星色
俯割所恩私
秦關忽在望
禾黍正離離
莊馗改故跡
人民能不非
不敢稱董仇
戎首竟為誰
韶齒擲邊塞
中原渺馬依
冉冉崦嵫景
條桑沐餘晞
荃蕙化蓬茅
何能薦庭階
寶鑑既已毀
拂拭愧光輝
寄語閨中質
千金當自持

古意

採桑秦家女
皎若千金璧
君王臨高臺
美人奏琴瑟
忽

來關雎操遠望中心懌遺以雙明珠繡袋文灘鵲家令
君王臣賤妾亦何匿槁壤比雲霄低昂疇能敵但恐失
身素玉體何當匹長跪前致辭低眉中含抑本自不為
雙悽然如初隻

謁陵有述

天開鴻濛秀萬古抱日月下有諸僊宮神龍蛻其骨靈
氣函山澤草木亦精發仰觀太清表隱隱浮員闕九幽
導金燈六丁護玉篋隧途流松風霓旌畫明滅恐是七

卷十
帝遊羣真來趨謁小臣雖末賤謬從大夫列尸祿帝所
嗔微誠何由達

其二

文皇起北平迅掃天下兵六飛燕然山却剗單于庭千
艘凌渤海象緯偃不驚遂令職方氏王會所未名竒琛
及恠獸重譯歸我明卜鼎故龍潛其陰鬱佳城愀然邊
烽色慷慨有餘情

其三

太陵一坏土仰視何嶙峋帝德浩如天豈以黃屋尊垂
衣十八載象彙俱含醇非無陰陽接四候均若春坐論
頌賢佛作行歸俊民寧知神龍逝化海邈無津握手三
輔臣扼腕竟何伸

晨入曹中即所見有感

東風吹微綠一夜千樹滿黃鳥坐交枝流聲自睨睨側
生牆陰栢樵悴一何短豈以真宰私幽獨受時緩

春旱三章

皇天無頗澤物運乃自乖柔木戀焦原不肯展青莢赤
日從東起亢風復西來雖有膚寸陰臨合倏已離安得
起驕龍為我鞭疾雷惻彼丘中叟負耒擬何之

其二

玄冬饒奇冽霜霰無停飄墮戶歌春德冀以惠來苗女
魃乘倭蟪未塗竟流焦陰陽無羸勝貴在得所調變理
豈在隅咎疊內慚招亮深為犧念敢以一身要

其三

了了數餘黎遼遼殊未央銀鏤窮天府技擊殲朱方比
井稀宿籍在公乏棲糧使者東西來璽書正相望輪蹄
金糾錯鞭笞血縱橫側窺驕陽意毋乃帝未詳矯首盼
穹蒼沈深竟難量

感懷

今晨東風至吹我顏色佳攬袂不及裳粉澤理光儀新
萋承天露朝榮際日暉雅步中宮商顧盼有餘姿臨當
中門發欲出故徘徊燕趙三千人一一自蛾眉所願在

當懷馬顧妍與蚩沈吟臨芳鏡掩約內傷悲

其二

清晨出游目顧見南山道挾彈美少年容顏白如縞拉
擲枯松樹上有乾鵲噪燭燿朱丸流宛轉墮荒草企聽
猶未畢吉凶不自保七尺長為人馬能制余老

其三

人生垂衰老倣如就途客藥餌相扶持攀車解輓輓不
行將難免暫留終何益著書以自寬聊為存者識明晦

既歧軌焉用留遺跡賢聖知有餘死生無中策

歲暮作

廓落鮮所娛沈憂歲偕暮連岫無間綠廣庭有儲素日
氣慘不舒玄陰莽回互晨風旦夕號岑棘竄狐兔引領
俟春陽春陽不我顧燕鳩代已往義和迫相度盈樽庶
可逃整轍將首路

早起書懷

晨雞四鳴號天地猶未白仰見衆星低歷歷如可摘揣

來浩無端數往已為跡言念乘輅始祖歲三代易謬以
理解資而當翫髀役何悟璽絲辰膺此保障責桑計非
所工商刑馬能擇稍清崔苻澤未愧萊蕪室蒿目中竟
乖蓬心逝安息次且類羝藩猶豫托雞肋疇當隣畏途
為我一察識

憤篇

牽絲誦經籍弱冠探仕錄觸緒多見違夙言將安屬策
馬涉鯨波操舟令從陸擾擾紅塵間馬為問車轂渭水

既入涇誰當辨非濁騏驥雖工步難與飛鷹逐神龍固
天矯變化求所欲喬松抖唐蒙首尾竟成束將循李陵
髮未銜鮑莊足銜憤戒伊人富貴生局促

題帝王禮僧圖

昔有龐眉師九載面石壁置心諸地外人天杳俱寂經
猿六時拜談鳥掌中食日出天地開藹然旌旗色襯施
填恒河結束儼帝釋雖屈萬乘尊對者了不識一吐無
聖言頓掃有為跡歸路甘雨移青林杏花白

金華集卷之二
轅馬歎

轅馬嚙枯荻，樞馬嚙青草。轅馬謂樞馬：我欲之，長道勞者常苦；饑佚者常苦飽。幽州碧眼客，鳴鞭如鴟噉銀鬣。鑿落蹄生，憐為人好。

題素節堂

汶嶺垂堅霰，淇澳挺修筠。詎若君子風，奕世鮮淄磷。伊昔中興初，尚書司國鈞。在公慕羔羊，操憲抑奔鶡。及乎懸車日，不復朱其輪。微言揭楣端，抗志薄商旻。儻然湘

江色寧染京洛塵太僕稱象賢在垌歌未伸三徑循風
資百石非所欣安節承上道素履率初真拂拭登君堂
頰仰愧其人孫叔請瘠邱千秋能食貧嗟嗟黍離歎糧
棟尚維新

寄題清嬾窩

秉介探夷尚謝囂負嵎癖雖復蛻汙濁安為事雕飾洋
洋泌流水結廬依其側飛花聊為逕野草紛如積荆戶
啟南薰胡牀挂東壁興至時命琴客來或不憤白雲何

英英卧君庭中栢不隨飄風逝為君助幽色

除夕

江城歲云暮北風何慘慄稍見亭午過黯然中原日飛
鳥時下來人家掃祠畢稚子欣就新華顛念趣失四十
行已盡明朝復加一躑躅山澤間無聞亦奚恤

孫文學丁冊度

會稽表神閼宛委徵帝藏詎若登君室步武見前芳邊
笥有餘委惠車不盈箱青熒藜牀色旖旎蘭橈香低雲

潤遺簡隙月窺流絢詠響出疎櫺迴風自琅琅恒聞詩
人肯攸求乃不臧蔬飲枕曲肱其樂自義皇舉趾觸四
周抗心凌八荒

為顧生題其父太保公臨趙承旨雙松圖

歲晏鬱秀色雙虬挂晴空下有李元禮謾謾松間風誰
將一幀素寫此千尺雄承旨昔勝流太保時宗工豈必
論形似心賞泠然同喬木存故家甘棠比遺蹤新篇並
差我流瀟各青蔥置子高堂上白雲或從中

為凌郡丞題柴桑雅致圖

陶令彭澤歸秋風何快哉與世既無營返服寧不諧
巖然一杯酒時送寒山來至今柴桑地遠高巖陵臺
矯矯凌大夫清標冠時才半刺日翱翔車馬生紅埃
展圖三歎息欲往道疑乖應跡若浮雲丘壑在軒堦
請以無累衷契彼千載懷

將以伏闕北首晨發即事有作

維稍候鳴潮伺鑰遵廣陌晨雞再三號使我天地白
太

陽麗層霄萬象欣自獲痛彼泉下臺永閔無生色微抑
不見宣苟存終何益席藁一上書引領希瞻識蒼麟代
司閤精衛聲不隔倘返楊公葬得從原阡側焚山無餘
懟誓墓有遺則遠愧密親來杯酒相慰藉鴻雁冥冥飛
焉知非謀食負耒安餘年托心在茲跡

二月朔渡淮即事

江南芳欲齊淮北綠初抽曾是一水隔候至物不週迴
風蕩枉渚落日多驚流榜人告宵征刺刺生百愁去棹

若攀崖來帆如赴湫大小各有營貴在中所求庶卉趣
春陽枯荻亦懷柔茲請苟未諧何以返故疇沒為九原
愧存為高堂憂亦知鬢畏素邁此不能休

歸懷示舍弟

北闕書雖上南山業堪佃吾弟沮溺流耦耕亦何怨軒
冕誠可悅焉能舍余賤謬忝七子列居然五君選去去
勿復陳深衷晚當見

旅夢作惡書此自解

溝壑偶不死來為世人弄太湖七千頃烟霞竟誰共殘
月將曙來清鐘應霜動殤子久已覺彭聃猶然夢去去
勿復陳吾生有吾重

謁孟廟敬述

嗚呼五畝宮茲實英氣聚長楸徑天風森然虬龍舞豈
無集鵲托喋嚟不能吐翔鸞翼丹扃蟠螭綉文柱中有
貴者像嶧碧流眉宇禮猶素王亞秩非客卿伍楊墨既
廓如儀秦亦微沮伊昔傳食時天開齊梁主其用不一

究歸乃成萬古諸僉何為者
瑱珠列周廡三復仁義篇
悠然配神禹

題九松卷贈張生

洛下九老人採藥徂徠山化為九松樹蕭然壓塵寰
蒼髯掀天風赤足踏潺湲顧謂五大夫惜哉多厚顏
夫子從之游不復歎才艱盤桓峭嶺下箕踞蹉我間
黃鶴呼欲歸白雲時與閑況有千秋苓青爾雙鬢斑
勿謂辟穀侯孤風遂難攀

迫檄首路擬再陳情感懷有作

山公援侍中實以世交故周子怨都亭知為一官誤余
本解官人巖數馬能固況茲回光矚差用洗沈悵栖遲
猶二始躑躅當三輔孟門苟已出康莊知前騫歎段終
在樞誰為譏蹇步鉛刀冀一割鋒鏑恐非故巨痛時磔
心深憂恒棲嗟露款一申言皇覽不反顧隕涕別親慈
含辛首前路嗣章倘見俞改服還韋布

移文兩臺乞休有述貽示舍弟

疲馬始戀閑饑馬始戀芻全魏夾澶漳茲實饒逸區上
宰匪私人迫若中所圖衆知蛾眉好混沌獨驚呼富貴
等逝飈況不與願俱徇知時中奮欲往復次且再疏若
沈波單辭倘見俞歐冶辨金材純鉤冀為耜鴻雁東南
栖遺音杳以疎因風及斯章茲秉亮不渝

連得故里書親友逝者五六輩皆齒相亞為之撫
然有感

日子啟北轅密懿遵江埤念昔火乍流茲今冰未泮如

何違時間相攜就塗炭冥攝不待符當暮寧容旦百歲
若須臾況乃未過半雖匪鄴下才能忘子桓歎浮榮誘
人老流景疾於竄慨靡黃金術可以凌霄漢竊聆無生
言庶幾叶幽翫

靜坐

茲方信間適吏事隨所遣白日偶屬余胡為但令晏漁
獵千古間所得亦已鮮空簷滴殘雪寒鑪裊餘篆默坐
無所思悠然端倪顯欲窺靜者功微青冒枯蘚

謁陽明先生天真書院

杖策尋幽嶽叩祠薦清蘋木落羣姿盡爛然見天真輕
風飄鬚眉蕭蕭若有神三字抉靈機萬古意忽新六經
遂糟粕千聖失經綸媚川在懷中舍檝問鮫人笑彼愚
公山老昧襄城津重恐魚目多冥然驕自珍所以老氏
歎聖作大道湮下學而上達吾意書諸紳

芙蓉園為用晦賦

桃李媚春陽容澤不終持松柏雖後凋誰為發華姿神

飈自西來百卉俱變衰感此亭亭質皎然溪之湄綠葉
凌勁霜朱華然素漪君子含章璣脩尚不傳時衡廬藩
茲植聊用以自怡

題馬遠十二水

上帝兩帶垂長江黃河流崑崙觸天漏下貯海一杯震
澤與洞庭匯作東南漚風雲出千變日月浴雙輪泓渟
寫秋星蕭瑟競素湫木落清淺出石壓琮琤抽其細沫
貫珠巨者膏九州誰能傳此神毋乃宋馬侯解衣盤礴

初已動馮夷愁天一臆間吐派九筆底收生綃十二幅
幅幅窮琬鏤惜昔進御時陡豁神龍眸遂令大同殿濤
聲撼牀頭六宮攝其魄所以不欲留楊妹即大家女史
司校讎朱填六玉筋墨宛四銀鈎錦縹賜兩府青緇潤
千秋晴牕乍開閱如練沾衣襟恍作銀漢翻浸我白玉
樓當其鬱怒筆楮表騰蛟虬及乎汨舒徐遙頸延鷺鷗
動則開智樂淵然與心謀老思鑑湖曲興盡剡溪舟左
壁桑氏經右圖供卧游那能學神禹胼胝終荒丘

過修武有歎

淮陰下廣武張耳佐其師全趙俱脅息彊燕自風披忽
逢隆準使赤節艷朝輝斥易兩雄帥脫若提嬰兒翦楚
朝奏勲夕乃失臨菑所以雲夢遊遂成曲逆奇蒯武豈
不臧帶礪乃吾欺純心奉明主加罪寧乏辭九族為君
盡千載令人疑

題遠菴堂

我國初離資君堂仍遠菴豈無女嬃戒惡草非所欲榮

芝當自秀藝蘭當自馥出為王者瑞處為幽人服鋤莠
慮傷禾伐莽表嘉木茲意幸偶同相將保空谷

經彭澤有懷陶公

陶公辭彭澤亦復聊其生磬折豈足勞而以事躬耕安
能如旅葵百穀產中庭鼎鼎百年內貴在願與并濁醪
佐新詩聊以娛性靈偶然獲為人偶獲千載名名者自
隨之獲者安所營竊窺逸民言令人愧浮榮

題振衣千仞岡為許給事壽

我愛許武仲春風隘堯天脫屣岳牧尊挂瓢清潁邊君
豈苗裔耶謔浪青瑣賢所遇稍不合葛中遂翛然角里
復綺村奕煜紫芝鮮峰峰足振衣何必箕山顛名當傲
千秋身當傲百年

題丘戶部汝謙吾兼亭

傲吏漆園氏大隱東方生心冥故黜跡機悟乃超名彼
美司農子夙有天倪盟子于握算間跌宕文史聲抱案
揖長官了若不相嬰拄笏對西山悠然有餘清識真垢

不辱貴我物自輕何必規往哲吾以師吾情

鍾太傅薦季直表真蹟後

千古談鍾書宣示乃其最寧知黃初載茲表有真際初
英麗朝陽雜羽栖霞泖剛柔自成克疎密各異趣始展
恍若新熟翫轉相媚遂令臨池者往往無宣示得新多
忘故我則異於是周鼎均所寶康瓠乃識棄

過定遠問漆園不得

茲地有漆園是否莊生廬遺蹟杳莫存遺言亦成誣北

風捲地來鵬翼寒不舒豈必真逍遙能無愛槍榆不才
懼鳧烹存者乃為樗令我何所據瞿然思遂初

思歸二篇

朝辭孟門險暮即金閭馳天路雖云曠枳棘猶未夷人
情好居薄為厚安得諧朗朗日中天浮雲伏崦嵫問齒
雖少餘其舌尚未隳自非偏師濟焉能日銜枚進當明
所繇退則保無為

其二

漢網既彌天萬羽爭見張朔風起不周安能遠飛翔鳳
皇雖五色在羅馬得祥仰天一雄鳴雖然中宮商豪鷲
擊鮮翰背距血縱橫與子既殊德疇見不相妨雖復化
為鳩鴛鴦未可量竦翼東南飛天池浩茫茫

題沈啟南畫虞山致道觀昭明手植三檜初名七
星檜

白雲團虞山有七蒼虬舞云當梁初代昭明讀書所雖
干乾坤底實飽冰霜苦其四托孤鷗帝遣六丁取存類

嬰園三去殺秦封五宋人雅好事往往為之補頡頏若
昆季厥始實孫祖隆準理固當小巫氣終阻昨余游真
宮脫冠憩其下日落長風來颯然精靈語及乎微月上
脩鱗森欲吐沈翁長康流為檜傳世譜不欲令漢傑輕
與噲等伍尺楮移秋山真宰在阿堵蓬牕一展看森陰
洗煩暑何必稱七星三星亦自古

今歲忽已知命仲冬五日為懸弧之旦不勝感愴
聊叙今昔得六百字

薄游狎流光五袞俄已至今為懸弧旦使我廢朝食竊
拊有盡身自杖終天淚罷牙息眾囂閉閣負餘惴離疏
非冠日通籍乃韶歲為郎曲方迓業已三上計比舍饒
俊民興辭驚遙詣雖匪大國香豈為當門植眾嫖方奏
姪如何獨求退棲遲三輔讞屏營東秦寄荏苒既如浣
蕭斧永絕試烈炎彌原來玉石同迸碎齟齬緹紫書艱
危子堅祀扣閣不覩天灑血空墳地豈無經瀆念處死
殊以未流哀悴松栢餘辱蒙蘿薜屯夷理垂極鼎革時

初際皇矚迴覆盆谷灰起幽吹徊徨深隱惻躑躅窺慈
意南舟徧楚越北轅轳晉魏蓬心絕羝觸櫟質慙魑技
疇謂偏竒裏謬中通人嗜三臺敢希歷九列無乃贅牽
馬似有曹攻駒豈吾藝是時秋欲暮天子問鄖帥爾以
中執法其往司節制尋叨璽書寵仍拜宮壺賜肅肅萃
冠簪悠悠度旌旆如何渭橋色已作天涯視嚴霜逐飛
蓋脩路疲征駟漢水擘峽來叅峰蹈空置褒斜綰單轂
井陘艱列騎偶同王遵叱無取子陽喟片檄寢赤丸尺

筮走墨吏据拾虞軍興縱舍伸主惠竊窺寬大朝因驛
上封事愚得或有一斯狂豈可二既采封非誠復貸尸
俎罪雖爾竭涓涖何由報恩施芳已凋蕙蘭辛猶殘薑
桂挪揄路鬼譏嬋媛女嬃詈策足趣暮閨長鳴埵其轡
甘為退飛鷁不作驤首驥松栢偶然喬寧因青陽媚誓
墓今已乖入宮頻見忌謬陪七子列恐為顏延棄雖謝
三君後未甘李膺易數往已自疑揣來人同愧伊昔虞
舜慕五十猶不替惟彼曼容扶六百旋請致而我獨何

為心跡兩成悖鬢訝蒲柳零身安匏瓜繫雕蟲業久賤
小草名還細服政政欲疲知命命何冀縱識去者非焉
覩來者是昔人多無聞今余焉足畏秋葉旦暮零親知
同飄墜江水日夜流富貴亦偕逝駐顏問刀圭多難損
根器飯誠悟正覺庶矣超人世

贈王詹事元馭

紫宮何崔嵬裊裊干青雲銅龍啟楓閭白虎薦衿紳委
蛇談經術天顏再為新日晏始言旋竹素良自欣乃知


金史卷之八
卷十
清梅上不廢箕顙真儀羽豈獨嘉漸當寄絲綸大化一
以漓魯叟不易醇無為守至正天下自歸仁

答劉太常子真

離離道傍芷隨風即芬敷習習谷中蘭引分任榮枯衆
姱競承顏靜女長獨居臨當趣君召且復立次且顧念
幽憂侶攜手命同車膏澤謝當年蛾眉日夜疎髮短不
受笄衣短不受裾亮無入宮妬焉能令君愉貴者但不
忘賤者亦自舒

寄石大理拱辰

昔我遊漳河邁子結歡好穆生攜其醴邃古恣搜討及
乎承平日子壯予亦老朔風吹飛藿倏忽辭中道為合
長苦晚為別長苦早蒲柳不待冬引分就枯槁寄言和
氏璧斯世方共寶為照當有時有光且自葆



弇州四部稿卷十